



Lescha per promover il svilup economic ella vischnaunca Tujetsch

Approbada entras la radunonza da vischnaunca ils 14 da december 2018

Vigur: 14-12-2018

I. En general

Art.1 Economia

Il turissem, il commerci, l'industria, la branscha da construcziun, l'agricultura e la branscha d'energia fuorman ils pli impurtants secturs dall'economia publica dalla vischnaunca. La tgira ed il svilup da quels secturs appartegnan allas incumbensas dalla vischnaunca.

Art. 2 Turissem

La vischnaunca finanziescha cullas entradas sebasond silla lescha davart la taxa da hosps e la taxa da turissem projects turistics ch'ei fatgs pils hosps e che san vegnir utilisai da lezs sco era mesiras da reclama egl interess dall'economia turistica.

Art. 3 Autras spartas dall'economia

Per ulteriurs projects che stattan buca en in connex turistic sco stipulau ella lescha davart la taxa da hosps e la taxa da turissem, sa la vischnaunca buca far diever dallas entradas tenor quella lescha. Quei independentamein sch'ei setracta da projects ch'empermettan d'augmentar l'attractivdad d'ina branscha ni ch'intenziuneschan da schaffir novas plazzas.

Art. 4 Intent e finamira

La vischnaunca vul promover in saun svilup economic. Ella sustegn las stentas dall'economia per rinforzar il turissem, il commerci, l'industria ed ils auters secturs en vischnaunca. La finamira ei da crear bunas cundiziuns da basa per ina economia persistente e da schaffir novas plazzas da lavur.

II. Promoziun dil svilup economic

Art. 5 Principis per la promoziun

¹ Digns d'in susteniment ein projects che gidan a rinforzar ed augmentar ina branscha e sia attractivdad. Cheutier s'audan denter auter projects ch'empermettan da sviluppar vinavon l'infrastructura dil turissem el sector dils menaschis da loschament, el sector dils mieds da transport ed en ulteriuras spartas turisticas. Plinavon era projects els secturs dil commerci e dall'industria cun l'intenziun da sviluppar novs products ni survetschs.

² Tier l'examinaziun d'ina damonda per prestaziuns da promoziun ein plirs criteris da risguardar. La vischnaunca po oravontut promover:

- a) novas interpresas ni igl engrondiment da menaschis existents;
- b) menaschis impurtants per il svilup d'ina branscha;
- c) menaschis che augmentan la qualitat dalla purschida;
- d) interpresas cumpetitivas;
- e) menaschis da character innovativ;
- f) menaschis che schaffeschan novas plazzas da lavur annualas.

Art. 6 Ulteriuras pretensiuns

Igl iniziament dil project ei obligaus da documentar ch'el ha fatg - el rom da sias atgnas pusseivladads e cun agid da tierzas personas - tut il pusseivel per segirar la finanziaziun dil project. Medemamein duei il project esser economicamein supportabels.

Art. 7 Exclusiun dalla promoziun

La vischnaunca astga buca sustener ina sanaziun finanziaria d'in menaschi existent che sesanfla en difficultads per exempel entras cuvierer ils cuosts currents dil menaschi, cun separicipar ad ina sanaziun finanziaria ni autramein.

Art. 8 Mesiras da promoziun

Per promover il svilup economic sa la vischnaunca conceder las suandontas mesiras:

- a) dar giu terren da baghegiar gratuitamein;
- b) dar giu terren da baghegiar gratuitamein en dretg da baghegiar;
- c) conceder ina contribuziun unica sco finanziaziun da partenza e d'agid;
- d) conceder in emprest senza tscheins. Tal ei da segirar;
- e) financiar prestaziuns preliminaras da planisaziun;
- f) procurar ladinamein per las cundiziuns necessarias da rama ella planisaziun locala e regionala;
- g) sustener damondas per levgiaments fiscals (art. 5 dalla lescha da taglia per il cantun Grischun).

Art. 9 Fond per il svilup economic

¹ La vischnaunca eregia in fond per la promoziun dils projects cun contribuziuns e prestaziuns tenor quella lescha.

² La suprastanza communal administrescha il fond. Ella dat giu plaid e fatg sur da tal a caschun dalla tractaziun dil quen e preventiv dalla vischnaunca.

Art. 10 Finanziaziun e gestiun dil fond

¹ Al fond per il svilup economic vegn attribuiu ina contribuziun annuala da frs. 50'000.00 ord las entradas da taglia ni/e la taxa da hosps. La contribuziun vegn approbada a caschun dalla tractaziun dil preventiv da vischnaunca. Tier in bien quen da vischnaunca sa in import pli ault vegnir contribuius al fond. La summa dil fond vegn plafonada sin frs. 300'000.00.

² La vischnaunca astga conceder contribuziuns mo aschinavon sco il fond dispona d'ina facultad. Muossa il fond in deficit, sto quel vegnir ulivaus sil pli tard enteifer treis onns.

Art. 11 Directivas per la decisiun

¹ La vischnaunca sa conceder per in singul project ina mesira ni el medem mument pliras mesiras tenor art. 8. La promoziun d'in project sa cheutras p. ex. secumponer dad ina contribuziun finanziaria (art. 8 lit. c), in dretg da baghegiar gratuit (art. 8 lit. b) ed in emprest senza tscheins (art. 8 lit. d).

² Las contribuziuns finanzialas che la vischnaunca sa conceder, ein limitadas sin maximalmein frs. 500'000.00 per in singul project. En tut astgan las mesiras previdas muntar a maximalmein 10% dils cuosts imputabels dil project.

Art. 12 Dretg legal

Sin mesiras da promoziun tenor quella lescha ha negin in dretg legal.

III. Disposiziuns finalas

Art. 13 Damondas

¹ Las damondas culs documents necessaris per ina ni pliras mesiras da promoziun tenor quella lescha ein d'inoltrar a scret alla suprastonza communal.

² La suprastonza communal sclarescha ils fatgs necessaris. Ils petents ein obligai dad informar la suprastonza communal e d'inoltrar ad ella tuts documents necessaris ch'ella giavischa. La suprastonza communal decida ni predeliberescha las damondas per mauns dallas instanzas cumpetentas.

Art. 14 Cumpetenzas

Las cumpetenzas concernent las expensas sedrezzan tenor igl uorden da cumpetenzas dalla constituziun communal.

Art. 15 Nova politica regiunala dalla Confederaziun svizra

Per novs projects che vegnan susteni dalla Confederaziun svizra e dil cantun Grischun vala quella lescha mo aschinavon sco ella secumporta cullas stipulaziuns e prescripziuns surordinadas.

Art. 16 Vigur

Quella lescha ei vegnida approbada ils 14 da december 2018 dalla radunonza da vischnaunca. Ella entra en vigur ils 14 da december 2018.